

■ COLUMNA

Datti moviment?

DA JOST FALETT*

Jau hai stui leger duas giadas. Sin la dumonda pertugant la critica da la furmagliun linguistica da la magistraglia respunda il schef dal departament responsabel en La Quotidiana dals 31 da december 2019: «La competenza linguistica da la magistraglia giuvna po esser fitg differenta. (...) Impurtant èsi che mintgin saja conscient nua ch'ella u el ha mancos e saja lura er pront da sa scolar vinavant correspondentamain.» È quai pussaivel? Per mintga auter rom fixescha il Chantun las competenzas pretendidas – e per il rumantsch duai mintgin decider sez sch'i basta u betg. È quai ina basa per mantegnair nossa lingua smanatschada? Almain la Scola auta da pedagogia reagescha ed elavurescha – passa diesch onns suenter la proposta ina certificaziun per las competenzas en rumantsch.

Per ch'il rumantscha haja in avegnir dovria tenor il professer per litteratura rumantscha *Rico Valär* dapli magistraglia bain scolada, ed el pretenda in'istrucziun obligatoria da rumantsch nuninterrotta da la scolina fin a la matura per uffants che creschan si en la Rumantschia. Oz lascha il Chantun decider sez tgi che vul frequentar las lecziuns da rumantsch. Pertge è gist il rumantsch facultativ? Giess l'entira classa en la chemia, sche quella fiss facultativa?

Ina finamira en il program da la regenza 2021–2024 tuna: «La lin-



gua e la cultura rumantscha e taliana duain vegnir mantegnidas a lunga vista en il Grischun». Cun quai ha la regenza reagì sin la critica dal Center per democrazia Aarau ch'aveva crititgà massiv ch'il Chantun promovia memia pauc la plurilinguitad e duaja er rinforzar cleramain la scolaziun linguistica. Lain vesair cun tge mesiras concretas ch'il Chantun vul cuntanscher la finamira costituziunala da promover il rumantsch. Il deputà *Lorenz Alig* mussa cun sia pretensiuin che la purschida da furmagliun rumantscha en las scolas medias duaja vegnir rinforzada in'ulteriura pussaivladad.

S per la scola media datti anc in auter champ impurtant, negligì dapi onns: la scola professiunala. In exempel actual: In Rumantsch prominent m'ha raquintà dacurt sias experiencias cun renovar la chasa en Engiadina Bassa, senz'excepciun cun masternants indigens. Discussiuns a bucca: be rumantsch – en scrit: be tudestg, schizunt tar pitschnas notizias. En la vita economica vegn rumantsch quasi be pli discurre. En sia strategia publicitada en La Quotidiana dals 17 da fa-

vrer accentuescha la Lia Rumantscha er l'impurtanza da la lingua scritta e scriva che per il mantegniment dal rumantsch dovria bunas purschidas sin tut ils stgalims, er tar las scolas professiunalas e medias. Senz'auter ina finamira centrala – dentant daco ha dà la Lia Rumantscha a la festa a Zuoz al di da las scolas il pled e la publicitad gist a quella scola professiunala che fa tant sco nagut per il rumantsch ed a quella scola media che actualmain gnanc na porscha la pussaivladad da far ina matura en rumantsch? E la scola media da Samedan che ha durant decennis purschi la matura bilingua ad agen cust e porscha quella vinavant n'è betg vengnida envidada, maindir menziunada. Quai è pauc motivant.

La strategia da la Lia Rumantscha en discussiun intuna l'impurtanza da las competenzas linguisticas per mantegnair il rumantsch. Ella cuntegn bunas finamiras. La realiziun da quellas munta dentant ina gronda midada da la politica da lingua actuala – ed i fa prescha. Il Center per democrazia Aarau di cleramain che la lingua rumantscha saja periclitada en sia existenza gia a media vista. I dovra bler moviment en la furmagliun linguistica rumantscha, e quai prest.

* Jost Falett, Bever, è stà durant blers onns scolast da biologia e rumantsch a l'Academia. Dasperas è el stà tranter auter president communal da Bever, president da la Lia Rumantscha ed actualmain president da la Pro Lej da Segl.